

ARLeF-Mittelfest: firmât il gnûf protocol di intese

Il president de Agenzie, Eros Cisilino, e la presidente dal Festival, Cristina Mattiussi, a àn confermât la volontât di puartâ a Cividât produzioni in lenghe furlane di alte cualitât artistiche

E va indenant la colaborazion tra la ARLeF - Agenzie regjonâl pe lenghe furlane e il Mittelfest. Il president de Agenzie, Eros Cisilino, e la presidente dal festival, Cristina Mattiussi, a àn rinovât il protocol di intese che tai ultins 10 agns al à fat rivâ a Cividât produzioni di alte cualitât in lenghe furlane.

«Il Mittelfest al è un lûc dulà che si cjatin tra di lôr lenghis, ma ancje culturis diviersis de Mitteleurope. Di tancj agns, al è ancje un dai spazis plui preseâts pes produzioni artistichis in lenghe furlane – al à ricuardât il president Cisilino -. In graciis dai protocoli firmâts tai agns passâts o vin inmaneât spetacui che a àn vût un grant sucès. Al è propit in chest agâr che o larin indenant a colaborâ, e cun cheste gnove firme o confermin ancjemò une volte che i nestris doi sogjets a àn intenzions compagnis».

«La colaborazion cu la ARLeF e insiore il Mittelfest e e infuartis inmò di plui la rêt di relations che o vin disvilupade in chescj agns, cun chê di jessi simpri plui inlidrisâts intal teritori, lant dilunc a mantignî une vocazion internazionâl – e à marcât la presidente Mattiussi -. La volontât comune e je une vore clare: promovî la lenghe furlane cun progjets culturâi e artistics che a vedin une cualitât une vore alte».

Di fat, la liste des produzioni ARLeF-Mittelfest in passe dîs agns di colaborazion e je lungje. Par citâ dome chês plui dongje di nô, tal 2019 al è lât in sene il spetacul "Maraveis in sfrese", tribût ae musiche e ae art dal Friûl, dal secul XVI fin vuê. L'an dopo al è tocjât a "Giorgio Mainerio, un misteri furlan", che al à tornât a dâ vite ai fats che a vevin puartât denant dal tribunâl de incuisizion il music de cort patriarcjâl, acusât di eresie e po dopo assolto tal 1563. Tal 2021, invezit, la colaborazion fra la Agenzie e il Festival e je rivade a puartâ in Friûl une ospite di gale: Tosca, che pe prime volte e à cjantât par furlan tal concerti "Timp e Tiare". Cualchidune di chestis produzioni e je lade in onde ancje su Rai5. La colaborazion tra ARLeF, Mittelfest e CSS Teatro stabile di innovazione FVG, invezit, e à puartât in sene "Maçalizi – Il dio del massacro", la version in lenghe furlane de comedie "Le Dieu du carnage", de dramaturghe Yasmina Reza. Il spetacul al à debutât al Mittelfest2022 e al à vût un grant sucès di public sedi in chê ocasion che dopo, cuant che al è stât puartât ator pai teatris.

Cul rinovâ il protocol di intese, la ARLeF e il Mittelfest a infuartissin il lôr rapuart di colaborazion, tal rispiet des particolaritâts istituzionâls di ognidun dai ents, par garantî che

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

il spettacul e la comunicazion des arts dal vîf in lenghe furlane a vedin une visibilitât simpri plui grande.

Ai 2 di Març dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<